

19/10/2003

Kain rentang terpanjang tanda murid hargai jasa Dr Mahathir

KUALA LUMPUR: Kanak-kanak pra sekolah, murid-murid tahap satu dan dua Sekolah Kebangsaan Polis Depot menghasilkan kain rentang sepanjang lima meter sebagai menghargai jasa Perdana Menteri, Datuk Sri Dr Mahathir Mohamad.

Aktiviti itu dijalankan sempena Hari Kanak-Kanak Sedunia dan Anugerah Kokurikulum 2003 di samping meraikan murid pra sekolah, tahap satu dan dua sekolah itu.

Ahli Parlimen Wangsa Maju, Datuk Zulhasnan Rafique berkata, program yang dijayakan adalah satu aktiviti yang cukup baik bagi memberi pendedahan kepada murid bagi memberi penghargaan kepada jasa pemimpin.

"Di samping dengan program sihat ini boleh mewujudkan semangat kerja secara berkumpulan selain mewujudkan generasi muda yang tahu menghargai jasa pemimpin", katanya ketika menghadiri program itu.

Sempena Sambutan Hari Kanak-Kanak itu, anugerah murid yang cemerlang dalam kokurikulum dan anugerah murid cemerlang dalam akademik juga diraikan bagi memberi semangat serta penghargaan.

Sementara itu, Guru Besar Sekolah Kebangsaan Polis Depot, Aziz Yahya berkata, dengan adanya program seperti ini murid dapat didisiplinkan dan bertanggungjawab serta membuka minda murid untuk berfikiran jauh.

"Program ini bertujuan menanam sikap menghargai dan bersyukur dengan setiap sumbangan di samping mengeratkan silaturahim di antara guru dan murid.

"Selain itu, program ini bertujuan mendedahkan murid kepada suasana luar sekolah dalam masyarakat terkini selaras dengan matlamat Kurikulum Bersepadu Sekolah Rendah (KBSR).

Murid Cemerlang Akademik, Nur Nabilah Othman, 12 berkata, anugerah yang diberikan amat berharga buatnya dan menghargai pihak sekolah dan ia memberi semangat baru untuk terus berjaya.

"Dorongan dan semangat yang diberikan oleh keluarga serta kejayaan abang dan kakak menjadi ikutan kepada saya untuk berjaya di masa akan datang," katanya.

Murid Cemerlang Kokurikulum, Ahmad Nazri Zaini, 12 berkata, minatnya dalam bidang sukan terutama bola tampar membuatnya bersemangat untuk mencapai kecemerlangan itu.